
КОРЕЯНИНГ "KOREAN POPS ORCHESTRA" ЖАМОАСИ ФАРҒОНАДА КАТТА КОНЦЕРТ ДАСТУРИНИ НАМОЙИШ ЭТДИ

Бугун вилоят театр ва концерт саройида Ўзбекистон ва Корея ўртасидаги дипломатик муносабатлар ўрнатилганининг 30 йиллиги ҳамда корейс миллати вакиллари Ўзбекистонга жойлашганлигининг 85 йиллигига бағишланган маданий тадбир бўлиб ўтди.

Корея Республикаси Инчхон метрополитен шаҳри ҳокимининг барқарор ривожланиш ҳамда сиёсий масалалар бўйича ўринбосари Хэн Сук Ли бошчилигидаги делегация билан бирга Фарғонага ташриф буюрган "Korean Pops Orchestra" жамоаси фарғоналиклар учун катта концерт дастурини намоиш этди.

Тадбирни очиш учун сўз олган вилоят ҳокими Хайрулло Бозоров Корея Осиё-Тинч океани минтақасида Ўзбекистон мустақиллигини биринчи бўлиб тан олган давлат эканига эътибор қаратиб, Президентимиз Шавкат Мирзиёев ва Корея Республикаси Президентининг саъй-ҳаракатлари билан ҳамкорлик алоқалари сўнгги даврда янги босқичга кўтарилганини қайд этди.

Корея Республикаси билан Фарғона вилояти ўртасида бугунги кунда кенг кўламли иқтисодий-инвестицион алоқалар билан бирга ижтимоий, маданий бошқа қатор соҳаларда самарали ҳамкорлик йўлга қўйилганини таъкидлаган вилоят раҳбари, Ўзбекистоннинг Корея Республикасидаги Фавқулодда ва мухтор элчиси Виталий Феннинг бу ҳамкорликни кучайтиришдаги хизматларини алоҳида миннатдорчилик билан эътироф этди. Хайрулло Бозоров ушбу тадбирни ҳамда корейс санъаткорларининг ташрифини ташкил этишдаги катта ҳиссаси учун Корея-Ўзбекистон Бизнес ассоциацияси раҳбарининг биринчи ўринбосари Эдвард Кимга ҳам алоҳида ташаккурларини билдирди.

Кореянинг халқаро миқёсда машҳур "Korean Pops Orchestra" жамоаси ижросидаги куй-қўшиқлар залга йиғилганлар қаторидаги, вилоятимизда яшовчи 5 минг 600 нафардан зиёд корейс миллатига мансуб фуқароларимиз вакилларини ҳам мамнун этди.

Ўзбек эстрадасининг ёш ёрқин юлдузлари – Камрон Мамадалиев, Ноила Ҳабибуллаева ва Шаҳноза Ёқубжонова ижросидаги “Ҳеч кимга бермаймиз сени, Ўзбекистон” қўшиғи бугунги Ўзбекистон-Корея маданияти байрамига алоҳида зеб берди.

Бизни ижтимоий тармоқларда кузатинг Facebook, Telegram, Facebook, YouTube, Instagram

2022-12-16 20:01:34